

## CONVENIO DE COLABORACIÓN ENTRE A AXENCIA TURISMO DE GALICIA E A ASOCIACIÓN DE AXENCIAS DE VIAXES DE GALICIA (AGAVI) PARA A CREACIÓN DE PRODUTOS PARA A REACTIVACIÓN TURÍSTICA DAS ZONAS AFECTADAS POLOS INCENDIOS FORESTAIS NAS PROVINCIAS DE LUGO E OURENSE

Santiago de Compostela, data da sinatura dixital

### REUNIDOS

Por unha parte, D<sup>a</sup>. María Nava Castro Domínguez, directora da Axencia de Turismo de Galicia, en virtude do nomeamento efectuado polo Decreto 120/2020, do 10 de setembro (DOG núm. 185, do 11 de setembro), e conforme ás facultades que lle confire o apartado dous da disposición adicional segunda do Decreto 108/2022, do 16 de xuño, de estrutura orgánica dos órganos superiores e de dirección dependentes da Presidencia da Xunta de Galicia (DOG núm. 117, do 20 de xuño), que desconcentra na titular da Dirección da Axencia a competencia para subscribir convenios de colaboración no seu respectivo ámbito competencial, de acordo co previsto no artigo 15.2.c) dos estatutos da Axencia Turismo de Galicia, aprobados polo Decreto 196/2012, do 27 de setembro (DOG núm. 193, do 9 de outubro).

E doutra, D. Juan Antonio Rivadulla Fernández, actuando en nome e representación da **Asociación de Axencias de Viaxes de Galicia (AGAVI)**, NIF G70063029, en calidade de presidente.

Interveñen en función dos seus respectivos cargos en exercicio das facultades que, para convir en nome das entidades que representan teñen conferidas e

### EXPOÑEN



**Primeiro.-** Que a Axencia Turismo de Galicia, segundo o Decreto 196/2012, do 27 de setembro, polo que se crea a Axencia de Turismo de Galicia e se aproban os seus estatutos, ten como obxectivo, impulsar, coordinar e xestionar a política autonómica en materia de turismo e, en especial, a promoción e a ordenación do turismo dentro da comunidade.

Para lograr esta finalidade a Axencia Turismo de Galicia, acomete no ámbito das súas competencias, un decidido apoio á promoción e fomento do sector turístico de Galicia a través daquelas accións que lle permiten acadar os seus obxectivos.

**Segundo.-** Que AGAVI é unha asociación sen ánimo de lucro, cuxa finalidade principal é representar, xestionar e defender os intereses profesionais dos seus asociados, atendendo ás súas necesidades de información, formación e asesoramento, e que nace cunha especial vocación de defensa dos intereses específicos das empresas nela encadradas, con independencia da súa denominación. A súas actividades desenvolveranse no ámbito territorial da Comunidade Autónoma de Galicia.

**Terceiro.-** Que a crise xerada pola evolución epidemiolóxica do COVID-19 provocou unha parálise total do sector turístico. Logo do impacto que tivo o estalido da pandemia de coronavirus no sector turístico en xeral e na intermediación turística en particular, unha vez recuperada a normalidade, durante o mes de xullo de 2022 unha vaga de incendios forestais ameazou o territorio da nosa comunidade autónoma, especialmente en zonas das provincias de Lugo e Ourense, nunha situación de extrema dificultade derivada da combinación de altas temperaturas, unha seca prolongada e un episodio meteorolóxico extraordinario denominado sistema convectivo de mesoscala. Esta vaga de incendios causou graves danos en diversos bens de titularidade pública e privada, incluíndo a destrución e afectación a vivendas da contorna dalgúns dos incendios forestais.

**Cuarto.-** Que no citado contexto, os acontecementos rexistrados determinan unha situación de emerxencia humanitaria e social para a cidadanía afectada, debido aos danos persoais e materiais que se produciron. Isto fai necesario articular mecanismos de colaboración para atender as situacións de necesidade en que se poidan encontrar os veciños e persoas



directamente afectados, e mesmo contribúan á restauración comunitaria e urbanística da zona damnificada para que poida volver á normalidade, así como a manter a actividade económica desas zonas danadas.

O obxecto do presente convenio pretende reforzar a promoción turística das comarcas do Courel e Valdeorras, así como a creación de novos produtos que reactiven a actividade turística na zona, a través da creación de produtos turísticos e a súa promoción e divulgación.

**Quinto.-** Que o obxectivo do presente convenio é contribuír a mellorar o posicionamento turístico e especialmente a súa chegada efectiva no mercado, das zonas afectadas polos incendios forestais no verán de 2022. Para iso contarase coa participación das axencias de viaxe minoristas que teñen chegada ao cliente final, que servirán como aliadas para posicionar os produtos turísticos e os atractivos destas zonas do interior de Galicia. Realizaranse accións de comercialización que melloren o seu posicionamento na canle, para que estas zonas afectadas polos incendios convértanse nunha das opcións preferentes á hora de seleccionar un destino turístico, especialmente fora do período estival.

Por este motivo resulta de interese público para o turismo de Galicia a participación e apoio nas accións obxecto do presente convenio, como medidas encamiñadas á reactivación do sector turístico fronte aos efectos derivados da vaga de incendios forestais ameazou o territorio da nosa comunidade autónoma. Dada a especialidade do obxecto do convenio, non procede a realización dunha convocatoria pública ao ser a citada Asociación a única entidade que poden desenvolver o seu obxecto de xeito completo, xa que é a entidade máis representativa no ámbito da Comunidade autónoma que aglutina ás axencias de viaxe comerciantes polo miúdo.

En virtude do anteriormente exposto, as partes acordan celebrar este convenio que se rexerá polas seguintes



## CLÁUSULAS

### Primeira.- Obxecto do convenio

Constitúe o obxecto deste convenio o establecemento das condicións para a colaboración entre a Axencia Turismo de Galicia e AGAVI para a creación de novos produtos que reactiven a actividade turística a través da comercialización de produtos turísticos innovadores e a súa promoción e divulgación na comarca do Caurel na provincia de Lugo, e na comarca de Valdeorras na provincia de Ourense, coa finalidade de dinamizar o turismo na zona logo da vaga de lumes do mes de xullo de 2022.

Os produtos incluíranse nas seguintes categorías:

- Paquetes orientados a espazos naturais, turismo ornitológico, turismo activo (roteiros de sendeirismo, BTT, etc.) e turismo de aventura, dadas as características propias do territorio.
- Paquetes que axuden á posta en valor do patrimonio tanto a nivel material como inmaterial.
- Paquetes centrados na enogastronomía como eixo esencial que configure experiencias no destino.
- Paquetes con atractivo específico na zona como poden ser destino Starlighth, turismo industrial ou actividades que poñan en valor o atractivo turístico dos encoros.
- Paquetes que teñan que ver co Camiño de Inverno de Santiago.
- Outros paquetes que se poida xustificar a súa idoneidade en base ás características do territorio.

Estes paquetes turísticos desenvolveranse nos Concellos da Comarca do Caurel: Folgoso do Caurel, Quiroga e Pedrafita do Cebreiro, e nos Concellos da Comarca de Valdeorras: A Rúa, O Barco, Rubiá, Petín, O Bolo, Carballeda, Larouco, Vilamartin e A Veiga.



As axencias de viaxes minoristas incorporarán estes paquetes a súa carteira, incorporándoos aos canles de comercialización que normalmente utilice.

### Segunda.- Orzamento e financiamento

1.- O orzamento estimado de gastos relativos ao obxecto descrito na cláusula anterior ascende a 90.750€ (IVE incluído) co seguinte detalle:

CONCEPTO	IMPORTE
CREACION DE PAQUETES TURISTICOS . 45 PAQUETESX1815 (inclue deseño, divulgación e difusión e comercialización)	81.675,00
XESTION DO PROGRAMA	9.075,00
<b>TOTAL (IVE incluído)</b>	<b>90.750,00 €</b>

Deste orzamento total, a Axencia Turismo de Galicia financiará as actividades cun importe máximo de 90.750 €, con cargo á aplicación orzamentaria 05.A2.761A.640.0, código de proxecto 2018 00002, dos orzamentos da Comunidade Autónoma para Galicia para o ano 2022.

A Axencia Turismo de Galicia procederá ao pagamento do importe a favor da entidade, unha vez esta presente a documentación xustificativa establecida no presente convenio.

En todo caso, a achega da Axencia Turismo de Galicia para posibilitar a realización das actuacións só cubrirá o custo de realización da actividade sen que a entidade obteña beneficio ou lucro industrial algún coas mesmas.

En todo caso, os gastos de persoal aos que se refire o orzamento estimado serán exclusivamente os do persoal propio, ou contratado ao efecto, dedicado especificamente á execución da actividade, sen que en ningún caso se financie o gasto do persoal destinado ao funcionamento ordinario da Asociación.



### **Terceira.- Compromisos das partes**

#### 1. Compromisos de AGAVI:

- Desenvolver as actuacións recollidas na cláusula primeira deste convenio, e que constitúen o seu obxecto.
- Facer constar a cooperación da Axencia Turismo de Galicia en toda a información que se difunda sobre as actuacións, tanto nos medios de comunicación como no material informativo que se puidera distribuír.
- Incluír en toda a documentación e soportes específicos das accións obxecto do presente convenio que se trata dunha actuación con financiamento da Xunta de Galicia e incluír a marca do Xacobeo 2021-22, de acordo co manual de identidade visual, aprobado polo Decreto 104/2021, do 24 de xuño, polo que se aproba a actualización do Manual de identidade gráfica Xacobeo 2021-22 (DOG núm. 132, do 13 de xullo).
- Subministrar á Axencia Turismo de Galicia, en virtude do disposto no artigo 4 da Lei 1/2016, do 18 de xaneiro, de transparencia e bo goberno, previo requirimento, toda a información necesaria para o cumprimento pola Axencia Turismo de Galicia, das obrigas previstas no Título I da citada lei.

2. A Axencia Turismo de Galicia comprométense a colaborar no financiamento do custe das actuacións previstas a través da realización do investimento previsto na cláusula segunda e a colaborar na promoción dos ditos produtos turísticos.

### **Cuarta.- Inexistencia relación laboral**

A subscripción deste convenio non implica relación laboral de ningún tipo entre a Axencia Turismo de Galicia e as persoas que realizasen as actuacións obxecto do mesmo, de xeito que non se lles poderá esixir responsabilidade algunha directa nin subsidiaria por actos ou feitos acaecidos no desenvolvemento deste.



Non se derivarán obrigas propias dunha relación laboral ou contractual de conformidade coa normativa vixente.

#### **Quinta.- Resultados conxuntos**

O diverso material promocional, elaborado en desenvolvemento das actuacións previstas neste convenio de colaboración, será de uso e titularidade común por ambas partes asinantes.

Así mesmo, calquera dereito de propiedade industrial e intelectual sobre o material que resulte das actuacións do presente convenio será de titularidade conxunta das partes asinantes, de xeito que ningunha poida facer uso dos citados dereitos coa oposición de calquera dos asinantes.

Calquera modificación dos resultados deberá ser autorizada polas partes asinantes, non obstante a Axencia Turismo de Galicia, no cumprimento dos seus fins institucionais, poderá utilizar libre e gratuitamente os traballos de campo, datos de todo tipo, resultados, análises, informes e conclusións que se deriven das actuacións obxecto do convenio. En todo caso, nas accións de difusión de datos e informes obtidos pola execución destas accións farase sempre referencia ao presente convenio.

#### **Sexta.- Xustificación**

1.- A achega prevista na cláusula segunda será librada pola Axencia Turismo de Galicia previa presentación da xustificación da execución das actuacións desenvolvidas, a través da seguinte documentación:

- Memoria explicativa da actividade realizada e acreditación do cumprimento do obxecto do convenio e da publicidade da colaboración da Axencia Turismo de Galicia.
- Memoria económica xustificativa do custe das actividades realizadas, que conterá:



a) Relación clasificada dos gastos e investimentos da actividade, con identificación do acredor e do documento, o seu importe, data de emisión e data de pagamento.

b) Facturas ou documentos de valor probatorio equivalente no tráfico xurídico-mercantil ou con eficacia administrativa incorporados na relación á que se fai referencia no apartado anterior e a documentación acreditativa do pago.

Non obstante, a documentación establecida nas letras a) e b) deste punto, poderá ser substituída por factura emitida pola entidade á Axencia Turismo de Galicia polas actuacións realizadas obxecto de este convenio de colaboración.

- Nos supostos de gastos realizados con medios ou recursos propios, documentos acreditativos dos gastos realizados e a indicación, no seu caso, dos criterios de reparto dos costes xerais e/ou indirectos incorporados na relación á que se fai referencia na letra a).

- Certificacións de estar ao corrente das súas obrigas tributarias e da seguridade social e de non ter pendente débedas por ningún concepto coa Xunta de Galicia.

- Indicación do número de conta para realizar o pagamento xunto coa declaración responsable sobre a súa titularidade.

A Axencia Turismo de Galicia resérvase o dereito a solicitar toda a documentación que considere precisa en relación coa xustificación do convenio.

2º.- O prazo para a presentación da citada documentación xustificativa remata o **15 de decembro de 2022**.

3º.- Se o investimento xustificado fose menor ao previsto no orzamento estimado contido na cláusula segunda deste convenio e sempre que se cumpra coa finalidade, procederá o pagamento que sexa obxecto de xustificación.



Non se entenderá incumprida a obriga de xustificación das actuacións obxecto deste convenio no caso de variacións das contías previstas nas distintas partidas establecidas no orzamento estimado na cláusula segunda, cando obedezan a razóns xustificadas e as actuacións que se levaran a cabo garden relación directa co obxecto do presente convenio.

4º.- A documentación correspondente á xustificación presentárase de forma electrónica a través da sede electrónica da Xunta de Galicia (<http://sede.xunta.gal>).

### **Sétima.- Pagamento**

O pagamento por parte da Axencia Turismo de Galicia efectuarase do seguinte xeito:

- No prazo máximo dun mes desde a sinatura do convenio, unha contía máxima de 50.000, co obxecto de financiar a fase inicial das actuacións preparatorias relativas ao deseño dos paquetes turísticos. Para isto, a entidade o deberá enviar a factura sinalada na cláusula sexta.
- A contía restante ata o máximo establecido no convenio unha vez rematadas as actividades, e levarase a cabo unha vez xustificada a totalidade do convenio por parte da entidade, que debe facerse coa entrega, antes do remate do prazo de xustificación, da documentación estipulada na cláusula sexta.

### **Oitava.- Comisión de Seguimento**

Para o seguimento do convenio e da súa execución créase unha Comisión de Seguimento, que estará integrada por dous representantes designados por cada unha das partes asinantes. A comisión será a competente para decidir calquera cuestión sobre a interpretación ou execución do presente convenio.

A súa actuación axustarase ao establecido na Lei 40/2015, do 1 de outubro, de réxime xurídico do sector público, e na Lei 16/2010, do 17 de decembro, de organización e funcionamento da administración xeral e do sector público autonómico de Galicia.



As cuestións litixiosas que poidan xurdir coa interpretación, resolución e efectos do presente convenio serán resoltas pola comisión de seguimento, e en última instancia dirimiranse na xurisdición contencioso-administrativa.

### **Novena.- Modificación e resolución do convenio**

1. As modificacións do convenio adoptaranse por acordo expreso e escrito das partes asinantes, e de acordo cos trámites que esixa a normativa vixente.

Así mesmo, e de conformidade co disposto no artigo 31.4 da Lei 14/2013, do 26 de decembro, de racionalización do sector público autonómico, os convenios subscritos pola Administración xeral da Comunidade Autónoma e as entidades instrumentais do sector público autonómico poderán ser obxecto de modificación cando teñan como finalidade o logro dos obxectivos de estabilidade orzamentaria e sustentabilidade financeira.

2. Serán causas de resolución deste convenio:

- O incumprimento do seu obxecto.
- O incumprimento total ou parcial de calquera das cláusulas que nel se establecen.
- O acordo unánime de todos os asinantes.
- A decisión xudicial declarativa da nulidade do convenio.

### **Décima.- Natureza xurídica, réxime xurídico e xurisdición competente**

O presente convenio de colaboración formalízase ao abeiro do disposto na resolución de 8 de abril de 1991 pola que se fai público a acordo do Consello da Xunta de Galicia, do 27 de marzo de 1991, sobre convenios de cooperación con outros entes públicos e con particulares.

Este convenio ten natureza administrativa e queda fóra do ámbito de aplicación da lexislación de contratos das Administracións públicas, segundo dispón o artigo 6.2 da Lei



9/2017, do 8 de novembro, de contratos do sector público, sen prexuízo da aplicación dos principios da citada Lei para resolver as dúbidas e lagoas que puideran presentarse.

Seralle de aplicación o réxime determinado na Lei 39/2015, do 1 de outubro, do procedemento administrativo común das administracións públicas; na Lei 40/2015, do 1 de outubro, de réxime xurídico do sector público, e polas demais normas en dereito administrativo aplicables ou, no seu defecto, polas derivadas do dereito privado.

**Décimo primeira.- Publicidade e rexistro do convenio e autorización e consentimento para que se publiquen os datos persoais e demais especificacións que figuran no convenio**

O réxime de publicidade do convenio será o establecido na Lei 1/2016, do 18 de xaneiro, de transparencia e bo goberno, sobre as obrigacións específicas de información sobre convenios. A sinatura do convenio leva implícita a autorización para o tratamento necesario dos datos e a referida publicidade, incluída tamén a publicidade no Portal de Transparencia e Goberno Aberto.

Segundo o artigo 15 da Lei 1/2016, de 18 de xaneiro, ademais da información que debe facerse pública segundo a normativa básica en materia de transparencia, a Axencia Turismo de Galicia publicará o texto íntegro do convenio.

Asemade procederase a inscrición do convenio no Rexistro de Convenios, de conformidade co establecido no artigo 5 do Decreto 126/2006, do 20 de xullo, polo que se regula o Rexistro de Convenios da Xunta de Galicia.

Coa sinatura do presente convenio as partes asinantes prestan o seu consentimento para incluír e facer públicos a través do Portal de Transparencia e Goberno Aberto e do rexistro regulado no Decreto 126/2006, do 20 de xullo, os datos de carácter persoal e mailo resto de especificacións contidas no convenio.



### **Décimo segunda.- Protección de datos de carácter persoal**

As partes asinantes responsabilizaranse de que calquera tratamento de datos persoais que puideran levarse a cabo en virtude do mesmo se realice con absoluto respecto ás normas de seguridade e de conformidade co establecido no Regulamento 2016/679 (UE) Xeral de Protección de datos (en adiante, RXPD), na Lei Orgánica 3/2018, do 5 de decembro, de protección de datos persoais e garantía dos dereitos dixitais (en adiante, LOPDGDD) e demais normativa concordante.

Os datos persoais das persoas físicas asinantes do Convenio serán tratados polos asinantes unicamente para a súa adecuada formalización e desenvolvemento en base ao disposto no artigo 6.1 b) do RXPD.

### **Décimo terceira.- Notificación electrónica**

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e os empregados das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de Notificación Electrónica de Galicia Notific@, <https://notifica.xunta.gal>. Para poder acceder a unha notificación electrónica, o interesado deberá contar cun certificado electrónico asociado ao NIF que figure como destinatario da notificación (persoa física ou xurídica). Así mesmo, o interesado pode autorizar a calquera outra persoa a acceder ao contido das súas notificacións.



**Décimo cuarta.- Vixencia**

O presente convenio entrará en vigor na data da súa sinatura, e terá vixencia ata o 31 de decembro de 2022.

E, en proba de conformidade, as partes asinan este convenio.

E, en proba de conformidade, e previa á súa lectura, ambas as dúas partes asinan o presente convenio na data da súa sinatura dixital

Pola Axencia Turismo de Galicia  
A directora

Por AGAVI  
O presidente

M<sup>a</sup> Nava Castro Dominguez

Juan Antonio Rivadulla Fernández

